

qualia efformata, inserviam. Quantum enim Tabulae, in quibus multa alioqui passim & sparsim tradita sub uno continentur intuitu memoriae profint, aliis judicandum relinquo. Ediderunt quidem ante haec Viri Clarissimi Tabulas Logicas, quae suam merito merentur laudem, sed plerique omissis praecipis Aristotelicis vel sua, hoc est, suis verbis concepta; vel Rami, cujus Philosophia fere passim exulat, suffecerunt, quae si adolescentes ediscant, ubi ad Academiam veniunt, alia ex peripateticorum scriptis memoriae mandare duplicato labore coguntur. Hoc ut praecaveretur malum, Aristotelis definitiones ac divisiones graecas, quae in nonnullis Academiis à Candidatis Philosophiae requiri solent, quantum fieri potuit, retinui, additis interdum dilucidis explanationibus ac notis necessariis Philippi Du Trieu, cujus Dialectica multorum jam teritur manibus: Ubi autem ex Aristotele definitiones ac divisiones haberi non poterunt, substitui aliorum probatorum auctorum verba. Quid? nil nisi quod ab aliis benè dictum adolescentes hic habebunt. Tantum igitur abest, ut tyrones & discipulos ab optimorum auctorum lectione avocem & abducem, ut potius invitem & adducam: Cum enim tum ob discipulorum memoriam; tum ob pagellarum interdum angustiam definitionum, divisionum & regularum exempla, limitationes, uberiores explanationes, nec non alia scitu haud indigna, sint omissa, ideoque de illis, ut unus vel alter liber Logicus tanquam praceptor mutus consulatur, semperque cum his Tabulis jungatur, spondeo atque moneo. Vobis verò Viri Magnifici, Nobilissimi, Amplissimi, Consultissimi, Domini Patroni & Fautores honorandi hasce pagellas Logicas, eam, quam par est, animi subjectione consecrare volui, propter benevolam V. Magn. Nob. & Ampl. erga literarum studia affectionem, quae ex vestrarum scholarum amplificatione, illustratione, conservatione & munificentissima nutritione, nec non fideli inspectione & necessaria correctione satis cognosci potest. Ut igitur V. Magn. Nob. & Ampl. hoc quicquid est carthacei munulculi fronte serenam suscipere, favorisque sui radios in me quoque derivare non dedignentur, etiam atque etiam oro. Valete quam felicissimè. Dab. 18. Sept. Anno 1628.

V. Magnif. Nob. & Amplit.

submissè colens

M. JOHANNES STIER.

PRO.